



Russell George,
Cadeirydd Pwyllgor yr Economi, Sgiliau a Seilwaith

SeneddEIS@cynulliad.cymru

28 Ionawr 2020

Annwyl Russell,

Diolch am y cyfle i fod yn bresennol yn eich sesiwn ar y Gyllideb Ddrafft ar 9 Ionawr 2020. Yn y sesiwn honno, dywedais y byddwn yn rhoi rhagor o fanylion ichi ynglŷn â'r materion a ganlyn.

Maes Awyr Rhyngwladol Caerdydd Cyfyngedig - Trefniadau'r Benthyciad

Caiff y symiau sy'n weddill o'r benthyciad eu tynnu i lawr dros 6 mlynedd gyntaf y cytundeb, sy'n golygu y tynnir y benthyciad cyfan i lawr erbyn 31 Mawrth 2025. Mae'r ad-daliad cyntaf yn ddyledus ar 31 Mawrth 2026 a bydd y benthyciad cyfan wedi ei ad-dalu erbyn 31 Mawrth 2044.

Y Cynllun Gweithredu ar yr Economi - Enghreifftiau o Fuddsoddiadau Rhanbarthol

Mae'r Cynllun Gweithredu ar yr Economi yn cydnabod bod economi gynaliadwy a chynhwysol sy'n tyfu yn hanfodol er mwyn sicrhau Cymru fwy ffyniannus, iach, cydnerth a mwy cydradd. Rwy'n falch o'r buddsoddiadau o ansawdd uchel yr ydym wedi eu denu er mwyn cryfhau ein heconomi a'n cymunedau mewn cyfnod eithriadol o heriol. Rwy'n darparu rhai enghreifftiau, fel a drafodwyd yn y pwyllgor, er mwyn amlygu'r ffaith ein bod yn gwireddu ein huchelgeisiau.

Prosiectau Cronfa Her yr Economi Sylfaenol

Mae'r Cynllun Gweithredu ar yr Economi yn newid ein dull o weithio o un sy'n seiliedig ar sectorau i un sy'n rhoi sylw newydd i ddatblygu cymunedau cryfach a mwy cydnerth. Mae'r ffaith bod £4.5m wedi ei ddyrannu i'r Gronfa Her yn brawf o'n hymrwymiad i rannu ffyniant ac mae'n hanfodol o ran datblygu economi ranbarthol Cymru. Gallai'r cyfleoedd busnes arbrofol hefyd ddod â manteision amgylcheddol drwy leihau milltiroedd bwyd a'r costau carbon cysylltiedig.

Dyma enghreifftiau o brosiectau llwyddiannus sydd wedi derbyn hyd at £100,000:

Cyngor Gwasanaethau Gwirfoddol Sir Ddinbych – mae'r Cyngor Gwirfoddol Sirol ar gyfer Sir Ddinbych, ac un o bartneriaid Cefnogi Trydydd Sector Cymru, wedi cael cyllid er mwyn defnyddio Neuadd y Dref Rhuthun yn hyb ar gyfer y gymuned a busnesau, a all

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1NA

Gohebiaeth.Ken.Skates@llyw.cymru
Correspondence.Ken.Skates@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

gynnig cyfleoedd newydd i gwmnïau annibynnol a mentrau cymdeithasol. Bydd Canolfan Cydweithredol Cymru yn cynnig cymorth hefyd i fusnesau lleol newydd ac i fusnesau sy'n fentrau cymdeithasol.

Cymdeithas Tai Rhondda – bydd y cynllun yn adfer eiddo gwag yng nghanol tref Tonypanyd gyda'r nod o adfywio'r stryd fawr.

Môn Shellfish ym Methesda – prosiect ar y cyd â Choleg Llandrillo Menai a Phartneriaeth Ogwen yw hwn a'i nod yw creu rhagor o farchnadoedd lleol ar gyfer pysgod cregyn.

Lunax Digital yng Nghaerffili – bydd y fenter hon yn datblygu Ap sy'n caniatáu i ddefnyddwyr gyfnewid amser a sgiliau. Mae ganddi'r potensial i ddod â busnesau lleol at ei gilydd i greu twf cynhwysol.

Cyngor Sir Abertawe – prosiect i helpu busnesau adeiladu bach i ymgeisio am gcontractau'r awdurdod lleol - sef cam cyntaf tuag at gefnogi cyrff cyhoeddus eraill i roi rhagor o'u gwaith i fusnesau bach a chanolig.

Nwy ac Olew Gŵyr – cynllun a fydd yn cynnig profiad gwaith i bobl ifanc, gan dargedu unigolion sydd mewn perygl o adael y system addysg a mynd yn ddi-waith.

Prosiectau Strategol

Canolfan Ymchwil Deunyddiau Uwch Cymru - Brychdyn

Bydd y cyfleuster hwn, sydd o safon fyd-eang, yn sbarduno twf a swyddi yng Nglannau Dyfrdwy, ar draws Gogledd Cymru, ac yn yr ardal drawsffiniol ehangach a Phwerdy Gogledd Lloegr. Bydd yn cryfhau'r ganolfan weithgynhyrchu sefydledig hon ymhellach, a bydd yn hollbwysig o ran denu'r ymchwil, y dechnoleg a'r sgiliau diweddaraf i ranbarth y Gogledd. Mae gan y buddsoddiad o £20m y potensial i ddarparu hwb gwerth £4 biliwn i'r economi dros yr 20 mlynedd nesaf.

KK Fine Foods – Glannau Dyfrdwy

Cynhyrchydd bwydydd wedi eu rhewi blaenllaw yw KK Fine Foods, ac mae'n cyflogi 525 o bobl ar hyn o bryd. Bydd ein cefnogaeth gwerth £0.550m o Gronfa Dyfodol yr Economi yn golygu y gellir bwrw ymlaen â chynllun ehangu gwerth £5.5m er mwyn arallgyfeirio a chreu 40 o swyddi newydd. Bydd hefyd yn cynnwys canolfan ymchwil a datblygu sydd â'r potensial i gynyddu'r cyfleoedd sydd ar gael i gyflenwyr o Gymru.

INEOS Automotive – Pen-y-bont ar Ogwr

Fel a nodwyd yn y pwyllgor, bydd Ineos Automotive yn datblygu ffatri gynhyrchu a chydodod newydd ym Mharc Busnes Brocastell i gynhyrchu eu cerbyd Grenadier 4x4 newydd. Rhagwelir y bydd y gwaith hwn yn dechrau yn 2021. Disgwylir y bydd yn creu oddeutu 500 o swyddi, gan gynnig cyfleoedd i lawer o weithwyr Ford y mae penderfyniad y cwmni i ymadael â Chymru wedi effeithio arnynt. Bydd y buddsoddiad sylweddol yn cynnig cyfleoedd cyflogaeth i gwmnïau sy'n ehangu a buddsoddwyr newydd eraill yng Nghymru.

Y Ganolfan Genedlaethol Manteisio ar Dechnoleg - Blaenau Gwent

Bydd y cyfleuster ymchwil a datblygu hwn yn cael ei ddarparu gan Thales mewn cydweithrediad â Phrifysgol De Cymru. Bydd y buddsoddiad mewn canolfan seibr, gyda chymorth cyllid gwerth £10m gan Lywodraeth Cymru, yn cynorthwyo busnesau i fanteisio ar y cyfleoedd sy'n cael eu cynnig ar lefel fyd-eang gan drawsnewid digidol ac yn manteisio ar

y sgiliau a'r wybodaeth sy'n ganolog i raglen y Cymoedd Technoleg. Disgwylir y bydd y bartneriaeth rhwng Llywodraeth Cymru a Thales yn creu incwm sylweddol, a'r nod yw y bydd yn hunangynhaliol o fewn 5 mlynedd.

Oxis Energy – Cynffig

Bydd Oxis Energy yn cynhyrchu'r gell batri lithiwm sylffwr gyntaf, ac mae'n arloesi ym maes technoleg celloedd uwch ar gyfer y genhedlaeth nesaf o fatris gwefradwy er mwyn pweru bysiau a thryciau. Ei nod yw tyfu'r busnes a chreu cannoedd o swyddi newydd yn y rhanbarth dros y deng mlynedd nesaf. Caiff ei gefnogi gan fuddsoddiad ecwiti o £3.2m oddi wrth Fanc Datblygu Cymru.

Y Canolbarth

Rydym wedi darparu cefnogaeth i Charlies Stores a Zip-Clip er mwyn adeiladu cyfleusterau dosbarthu a chynhyrchu newydd yn ystad Buttington Cross yn y Trallwng. Yn y Drenewydd, byddwch yn ymwybodol bod Nidec wedi cwblhau'r broses o brynu yn ôl eu canolfan ymchwil a datblygu gwerth £4m yn ddiweddar, sef canolfan a gefnogwyd ac a adeiladwyd yn wreiddiol gan Lywodraeth Cymru.

Rwy'n gobeithio bod yr ymatebion hyn yn ymdrin â'r meysydd sydd o ddiddordeb i'r pwyllgor. Diolch i chi am eich cefnogaeth werthfawr, a'ch ystyriaeth o'r blaenoriaethau o fewn fy mhortffolio.

Yn gywir,



Ken Skates AC/AM

Gweinidog yr Economi a Thrafnidiaeth
Minister for Economy and Transport



Lee Waters AC/AM

Dirprwy Weinidog yr Economi a Thrafnidiaeth
Deputy Minister for Economy and Transport